

四庫全書

集部

欽定四庫全書

集部

石倉歷代詩選卷四百七十八

六至

詳校官石中允臣薩敏

侍讀臣孫球覆勘

總校官進士臣朱 鈐

校對官中書臣李 荃

謄錄監生臣俞 鳳

欽定四庫全書

石倉歷代詩選卷四百七十六

明 曹學佺 編

明詩次集一百十

李汛

字鏡山  
歙縣人

水月樓

禪居何所為禪定亦何思  
夜涼敞塵牖待月臨前池  
松風鳴淅瀝桂露光參差  
素魄皎孤鏡浮輝漾清漪  
杳然

心境靜役役誰能知

次韻古詩與文遠萬里別

龍鬚紛莽莽軒馭去不還  
澗水流桃花香然出空山  
僻性嗜登覽進武寧辭艱  
風景隔煙火雞犬殊區寰  
玉女相從遊霞袂青絲鬟  
靈泉浴初起覩我回春顏  
煙霏渺無極疊疊蓬萊關  
蓮峰三十六出沒海霧間  
飛鳥不可度猿狖愁躋攀  
何當脫敝屣朝乘白雲閒  
入夕弄明月

二十四溪灣

送吳克敏還新安

我來白下門歲月亦已久春葉感秋霜五見白門柳同袍若晨星寂寞掃愁帚天涯惟子親寒盟喜仍守子來在我前我歸在子後送子渺江雲愧莫贈瑤玖北風吹我心遙挂三山口故園嘉樹密爽氣通林藪石澗坐濯纓此樂分我否

送馬大尹任歙

邂逅北都門而言下邑事土隘生齒繁千金買寸地美

哉水與山清急還峭厲性剛良有由而亦多節義故家  
尚典刑喬木經晉魏吾侯赤刀才豈啻割雞易他年入  
上林終當奮荆棘

遊樂園為葉希成作

少年挾千金作意遊齊魯尼阜快一登海岱從厯覩紛  
紛二毛人未能出門戶如子江湖間揮灑亦足數天涯  
偶相逢一笑西樓午異鄉叙松蘿夜榻感風雨念念不  
能別臨歧復何語顧茲兩巨邦習尚異風土善惡有明

言惟子慎去取眷言勉于斯少為遠遊補

折柳贈行人

折柳復折柳輕盈滿素手臨岐贈行人一葉重瓊玖豈知風不停隨手即飄零紛然不可收盡逐江波流

韓大尹公過訪

庭樹藹初綠石蘭咀幽香山深賞客稀但恐辜春陽令君邁潘岳花縣饒春芳愛我謬謂賢攜春賁茅堂妻孥亦驚仆此意誠莫當山肴與濁醪攀留媿荒涼喜有知

時鳥常筵弄宮商歡舞昧去留豈但形迹忘遂欲脫塵  
屣乘風共翱翔青山添故事白屋生輝光

題宗人進德翁蒼溪野隱卷

彼美蒼溪人綸巾自蕭爽鷗沙與鷺磯清福久專享時  
唱滄浪歌鼓枻按清響一醉復陶然豈知在穹壤我欲  
從之遊乘秋弄清瀼悲哉事已非空爾動遐想風雨暗  
前灘聊以慰疇曩

過環溪訊朱廷申



一水如巒山盤迴不能去  
兩山肘交來亦欲留  
水住我有平生人讀書綠陰處  
近聞客西湖試問歸來未

擬古

昭君殊薄命  
萬里嫁胡兒  
三軍不作氣  
紆難委蛾眉  
盈盈絕代色  
漢主元未知  
入辭見光彩  
徒欲殺畫師  
世故類如此  
誰能別妍媸

東麓

結廬枕東麓  
卧看西林晚  
十里溪雲寒  
靜聽益清遠  
落

葉山徑深殘秋石苔淺時逐漁樵人竟日恣幽踐我已  
賦歸來亦欣世榮遣春雨紫芝肥何當共君蹇

北澗

北澗寫流月皎皎明素波靜者自有適獨行還獨歌一  
徑循逶迤兩崖風葉多寂歷斷塵踪惟聞笙鶴過

友山為表弟方德新作

環祁皆青山何者與子友青蘿枕北樞白石倚南斗松  
皐展鶴翰煙嶺束閭口此山之最佳取益云已久悠然

卧其間豈但樂杯酒相對兩忘年不覺先白首聞之為  
長歌餘響震林藪借問歌為誰鏡山老詩叟

石山阻雨

春霖故不休予卧亦嬾起歸夢五更寒飛度雙溪水有  
客正候門把手相晤語覺來獨蘧蘧猶坐石山雨

過潯溪贈方從矩

山雨乍收晴溪光帶煙綠煙底羣峰攢蒼影瘦如玉愛  
此坐忘還為唱滄浪曲何處漁舸來粼粼破冰穀

賦得張公山送程本和之京

一峰矗矗雲中起，樹杪離天不盈咫。支曼逶迤何可窮，  
磅礴江南數千里。向人好鳥弄絲簧，觸目奇花絢羅綺。  
擬登絕頂汗漫遊，俯視羣生渺如蟻。一時高興浩難憑，  
盡託離歌壯遊子。紅霓氣吐逼霜旻，紫電腰懸拂秋水。  
瀛洲聲價高于山，珍重斯行須仰止。後會應知幾許時，  
杏花御苑東風裏。預喜金吾是故知，夜半行蹤信騶駟。

分賦琪園瑤草

蓬萊之山有奇卉瀚海珊瑚始堪比攢芳萃美翮東風  
紫翠如煙吹不起昔人曾此拾靈苗飛過弱流三萬里  
歸來種向七門山幾度春光青未已山中老人負顏齡  
扶杖時來一停屣軟沙塵外枕雲眠細嚼芳英足滌澹  
千秋擬駐鏡中顏歲月人間自流水

題墨蒲萄

雷車夜碾山雲殘螭龍驚震江波寒崢嶸直上青霄蟠  
忽然下飲研池寬墨花香暖朝未乾爪痕屈曲珠影團

清光照夜夜不闌摩挲老眼驚奇觀便覺風雨生毫端

舟中

中流一葉送夕暉鳴橈笑看青山飛翼翼孤亭秋水曲  
瘦影蕭蕭漾寒淥西林欲暝煙景多苦吟不盡將奈何  
紛紛明月來素波

鞦韆美人

鞦韆架上誰家女翩然燕子東風裏輕輕掠地還飛起  
金蓮倒挂鴉鬟欹倦來扶向雕欄倚春光遮莫隨流水

清宵一枕羅幃美不知花落荼蘼雨

鵬鳳行

崆峒翠鳥逢抵觸飲翼下飲雲根泉華梁紫燕嚇淘河  
尋泥疑與爭江煙池魚無足城火及麒麟乏趨困魯田  
大鵬一日上九萬斥鷃仰笑胡為然鳳凰覽德不易下  
網羅莫致慚少年上如鵬兮下如鳳兩間風日殊翩翩

夢書亭

西堂耿耿清夜長夢回春草生池塘阿咸十五善操筆

舞劍不數公孫娘乃知中書魂未死授筆猶解上鍾王  
夢書之亭所由作冥冥庭訓焉敢忘阿咸今更破萬卷  
終日手披魚粉香梅花樹底石厓上對亭擬構諸墨庄  
短歌試為一揮灑風雨滿幅蛟龍翔

卧雲樓

雲山有幽人掃雲鑿雲根結屋兩山隙山雲接樓屯簾  
鳥時往來簷風自迎送悠然卧其間忽作崆峒夢雲影  
繞窗扉雲氣襲余衣千金不換雲深處日高睡熟無人



非香靄一聲呼白鶴知是仙人夢初覺啟關人去晚山  
青坐石看山對花酌

虞部賞牡丹

春深雨淨香塵空寶欄晴霧飛濛濛三河淑氣轉南土  
一夜鹿胎迎曉紅護寒綠幕裁輕縠嬌倚東風睡初足  
潮暈鮮鮮印粉痕宮黃點處雙蛾簇新鶯隔柳調春聲  
午衙風散天香清翠鸞擁駕停朱欄天然國色殊輕盈  
袖羅時捲香雲軟力怯不勝風剪剪向人如欲話素心

玉粳半露櫻唇淺楊家姊妹恐未如瓊樓金屋誰當居  
風流有客看不足渴懷慰盡傾心初醉翁四度洛陽裏  
宦轍匆匆忙未已人生樂事能幾番莫惜花前傾綠蟻

題山水障

王孫妙思奪化工儘收丘壑藏心胸醉來傾倒玉壺墨  
灑向鵝溪作秋色濕雲初起山翠新回風不斷波粼粼  
石梁煙外轉蕭瑟薜蘿掩映幽人宅逍遙二老晚風餘  
沿溪散步飄輕裾翩然與鶴立松下彷彿當年避秦者

人間舊路杳無蹤  
雲深不遣漁郎通  
君不見秦家鹿走  
楚蛇斷滄海桑田幾興歎  
惟有仙源歲月賒  
碧桃未落秦時花

雪屋歌贈畫士徐子董

朔風吹雨凍不禁  
六花亂墜彤雲深  
千山萬山倏改色  
老鶴飛去不可尋  
屋下徐生頗清致  
擁衾孤榻耿不寐  
晨起操觚試一揮  
素光滿紙生寒思  
野梅橫放水邊香  
小橋瘦蹇詩情長  
瑤臺冰檻絕煙火  
勾連玉樹森千章

購之往往不論價雪厓之名從此多幾回坐我清谿堂  
對此令人不知夏

竹山詩贈謝時卿

春雷夜驚籜龍走頭角戢戢迸出土山翁謂此是龍孫  
崢嶸不與塵俗伍一朝解籜欲飛去參差又似青鸞舞  
山中有此山更清百尺珊瑚不須數何當來卧竹間亭  
借聽碧玉鳴秋雨

醒翁亭

春風吹芽長一寸雨染煙漸叢綠嫩焙爐火活霧氣殘  
鳥嘴初乾香欲噴燒竹烹泉沸乳花一啜肺魔如遠遁  
嗜茶天下人同情一時無此神不清歐公飲酒曾稱醉  
今我嗜茶宜號醒醒翁有亭文不驚安望醉翁千載名

黃花歌壽宗人廷和翁六十

短籬采采清露溥老菊秋來自佳色如何開向晚風前  
不與春花競紅白春花爛熳不耐看轉眼片片辭枝殘  
爭似黃花瘦且勁寂歷不畏嚴霜寒思思太守何足數

歸來種菊亦成圃落英咀嚼衰顏春百年甘作東籬主  
慎齋宗老本逸才壽域適對黃花開黃花白酒有餘樂  
自不與世相低回君不見萬石之君膝如婢不當菊潭  
一杯水

碧溪曲贈汪時顯

溪居之樂樂何限時采溪毛作溪饌遠渚分光綠鴨頭  
碧波冷逗胡僧眼短蓑小笠舟搖搖柳絮如雪吹不消  
清風一竿釣落日白雲幽話停歸樵馬蹄羹炊沙水鼃

春雨鱸斫桃花鰕老瓷傾倒竹葉青醉向溪頭弄明月

湖口阻風登石鐘山

石鐘之山古所稱山靈似欲留我登北風逆船不可去  
推窗正見古畫屏碧玉玲瓏數千尺截泉拔起湖中冰  
百怪千奇不可狀縱橫妙筆疑右丞逍遙聊試黃山藤  
不辭瘦影穿峻嶒訝然之下一小閣詰曲欄干殊可凭  
欸乃一聲煙水上半江殘月收魚罾

瓊花觀

此地飛瓊曾駐車當時偶落九還砂素香顆顆無人拾  
一夜東風吹作花靈根元自神仙手人間那有花為偶  
我來空見無雙亭花根花葉俱無有仙亦難憑千載後  
不如隨寓傾樽酒

過西沙訪田希宿

風雷一夜相驅逐天瓢翻雨輕珠玉曉行西野塵不飛  
千頃水苗相映綠田家處處起炊煙麥飯飄香出茅屋  
停驂試問隱君家為指前村柳溪曲



途中

翠谷發輕籟翩然動遠思馬投歸路疾雲起故山遲落  
帽何曾顧到家猶未知固應山鬼笑亦任野人疑

登永禧寺

獨步斜陽在清風滿素襟小亭依澗曲一徑入林深幽  
榻漬花雨晴窗印竹陰坐來沙鳥狎久已忘機心

謝元卿養病松山慕還丹因寄

憶自松山別于今已十年舊遊悲作鬼新雨擬談仙藥

竈燒殘葉出扉掩暮煙紅稀林漸瘦須避朔風前

寄于清流

飛鴻何處去好為報平安驅虜中原易忘情一念難振  
翰思遠舉燠爪願生還諒在絲蘿好終能照肺肝

新店遇雨

滴滴鳴秋雨孤篷夜不眠明燈留永夕暗葉墜殘年茶  
乳香翻雪松煤冷潑煙世塵疑脫盡瀛水更誰仙

遊徐氏南庄

路出南郊迥詩懷漸覺幽  
逕苔分綠細園樹綴紅稠  
鳥語山樓午風生水檻秋  
忘機鷗便狎不道是君侯

二

拂石池亭上薰風暑葛輕  
簾通霏翠澗泉送浪花鳴  
遊屐初分樂詩九未了盟  
卜隣何日是相與濯塵纓

薌口

萬仞羣山下蕭然一小村  
雲根餘地少霜葉墮林繁  
野水遙通舫青山正對門  
主人能下榻連日得幽論

宿西墅草堂

西墅雨初霽清和爽客情山泉觸石碎林籟落風輕古  
壁鳥遺迹曉窗雞應聲荀家多士在燈影燦奎明

贈別羅子應

問舍知何處相隨可作隣林鳩鳴正拙蕉鹿夢方新異  
姓有兄弟忘形無主賓臨行不能舍山雨亦何頻

遊靈谷

十里松陰路青芬撲馬頭山門迎梵樂水曲泛仙甌南

國無雙寺東風第一遊可憐梁武墓荒對寶公丘

又

縹緲白雲深幽歡試共尋萱華分片玉松餅嚼團金花  
落春無語山空谷有音竺談叅未透猿鶴却知心

留別友人

邂逅清溪上蕭蕭秋雨前松蘿有佳客杞菊共芳筵不  
作江湖氣每拋文字錢何時遂歸志同泛米家船

遊閭門二首

一夜芙蓉雨溪肥正受舫巾袍明水石鼓吹候蘅臯破  
霧開閭闔乘風度剪刀好山隨處看杖屨不須勞

山吹曉收晴雙溪夾鏡明燕頭剛十里牛背是初程灘  
雜歌聲碎舟搖舞影輕神仙開水宴魚鳥莫相驚

寓內姪汪肅夫書屋

展卷風簷下悠然興味長蟹花浮茗乳蠹粉落芸香得  
水知魚樂銜泥笑燕忙角弓聊賦罷夜雨耿秋堂

航隱

萬里江南客，浮居似小航。  
對鷗閒把釣，隔水聽鳴榔。  
龍去風雲冷，春餘草木香。  
逃名終不得，身已近清光。

浴佛日南山書院篁墩先生與道人談玄

慶罷祇園紫氣賒，偶逢仙侶飯胡麻。  
隔林清晝聞啼鳥，滿院蒼苔覆落花。  
盛世豈應長賜玦，達人方欲遠乘槎。  
悠然話到無言處，幾樹殘陽影欲斜。

池河七里灘登岨小步

鄉心漸覺詩情好，寂歷疎花逸興多。  
兩岨幽禽頻狎客，

滿溪明月不驚波放懷一路尋佳菊乘興三杯試淺莎  
豪氣歸來倍疇昔凌秋闊步更高歌

夜雨漏屋移牀

茅屋春晴破未修夜來新雨漏斜溝疎聲滴滴鳴藤簟  
秋思蕭蕭滿竹樓病骨怯寒癯似鶴謀身無術拙于鳩  
移牀尚可留高卧多少萍蹤水上浮

山驛次典史謝君韻

江左風流舊擅名長裾趨幕本儒生偶看白雪殊相慰



不負青山此一行茗碗月來團素影柏厓氷斷碎寒聲  
小橋況與梅花近詩句因君分外清

吳定夫久客嶺南以詩寄之

別久全忘話別時長年春草負歸期半窗涼雨驚蕉葉  
幾度炎風熟荔枝衣錦自應嗤夜色囊金誰肯滯天涯  
倚廬人在君知否望斷蠻煙鬢欲絲

江左邱惟明訪余萬山草亭

一椽深隱翠微間客至相延只看山林鳥向人如答語

野花臨水若為顏  
飲同文字真成樂  
遠託絲蘿可遽還  
更摘雨蔬供夜話  
不妨聊共白雲閒

鳧溪口山遊偶成

雪痕消處碧參差  
新霽登臨遠更宜  
鳥立霜枝棲不定  
馬臨冰徑步應危  
竹岡遙指胡公墓  
麥隴猶傳佛子基  
莫笑停驂成久坐  
愛山寧費買山資

臘月廿八日抵家

風雪飄零忽到家  
琴書猶是舊生涯  
休嗤草屨為名累

且頌椒盤度歲華老鶴趨庭還認主寒梅遶屋正開花  
北堂況復逢初度一曲長生宴紫霞

適間為朱升伯乃翁題

關野湖山綠蔭繁年來懶出草堂門卧聽白鶴鳴松露  
起拂青銅照枕痕清晝花間棋一局晴沙鷗外酒雙樽  
高情直想羲皇上世事從人曉至昏

金陵送汪以正歸新安

秋水碧梧風露清隔年桑梓動歸情青山路出龍灣樹

白石江臨虎踞城回首真成雲鳥散照人偏喜水天明  
文章已得調羹味足慰天涯老友生

奉送大司寇戴公歸祭

老臣為國受君知如海恩波豈有涯貴極欲歸誰不願  
功多得請自非私旌旄祖道來千駟桃李春風愧一枝  
無限晴光照行色故人猿鶴候多時

與王兵馬道舊兼話別

弱齡風雪暮江湄一別星霜幾度移京邸相逢不相識

客懷成喜又成悲，謾因楚節分香黍。  
還擬鍾山剪綠葵，夜雨袁杯須數把。  
鴈南應是北征期。

涇河登岍過營屯

北風三日為誰生，一棹歸來拂浪輕。  
紅日半山迎曉眺，白雲隨地逐秋行。  
陰屯細柳營門舊，聲遶平林牧笛清。  
却憶邊庭烽火急，不知何日罷胡征。

徐州憶別

黃塵飛撲鬢鬢鬢，遠道蒼茫甚不堪。  
獨喜西風來枕上。

雙吹清夢到江南  
碧天連水帆孤去  
綠樹驚秋葉半酣  
明月故人千里共  
芳樽兩地影相涵

壬戌秋南還阻風

逆浪回帆憶去秋  
葦蘆汀港我曾留  
一帆風雨仍前處  
滿眼江花感舊愁  
赤壁良辰無客賦  
青山落日有仙樓  
煙雲變態多殊狀  
却付漁罾次第收

江雲于我本無期  
去客相看有所思  
天外飛鴻歸欲暮  
蘆根維棹坐移時  
幽分白鷺雙洲景  
閒補黃花九日詩

誰到桑乾始愁絕隔江煙柳便離離

殷家會舟中即事

雁聲何處墮吟邊午夜西風霜滿天  
兩岬殘楓紅欲雨  
一溪寒玉碧生煙  
滿穿石齒秋光淺  
徑達峰頭棧勢偏  
貂敝歸來書畫在  
風流誰笑朱家船

席上贈涂司訓

正探春風滿絳幃  
泥塵新雨復如絲  
石林流翠巧當座  
花徑飛紅漫入詩  
久宦已全諳土語  
高談真可解人頤

酒酣莫訝歸途晚江右風流我願師

送惟高還江左

小餞蒲汀對竹開青青萬玉照離杯春潮此夕催初發  
夜雨何年卜再來十日溪雲慚我主六橋湖月擬君陪  
東風定趁桃花浪先過孤山一弔梅

初秋小雨

暘暑侵人將奈何忽聽疎雨送秋過驟驚珠玉應無價  
暫響梧桐恨不多涼意頓來生夜榻濕雲猶未舍晴蘿



何當三日池亭上飽聽蕭蕭打綠荷

薌口道中

到處天公有客情曉來殘雨又收晴  
春回淮水層冰破風便江帆一羽輕  
屈指昨當聞去信候門應已定歸程  
歲除預喜團圞守燈火逾前幾倍明

次韻羅子應訪予道中之作

十里衝寒到石關興高真不畏途艱  
竹邊舊闢雲三徑松底新分月半間  
穿圃活泉通小院鳴春好鳥破幽山

孤居政少能吟客願解塵纓濯澗浚

書院牡丹一株先大父手植者往年開花只四

五今年盛開十倍甲子歲也

離迷雲錦亂成堆却憶先人作意栽一樹春當千樹看  
百年花併此年開風流有待應誰賞富貴無媒忽自來  
不怪衆芳甘北面嫣然國色本天裁

次韻程地官時昭風浪之作

風雨停舟江曲間此時詩酒可相慳青山霧隱疑無地

白岬潮生已沒灣  
鼉鼓天桴揚水陣  
蜃樓煙市擁銀山  
奇觀正喜開心眼  
可作尋常遊子顏

西湖重遊

一晴山水倍爭奇  
晴雨湖光信兩宜  
但覺鏡中浮態變  
不知天上畫船移  
樓臺半出蓬萊世  
花柳全非歌舞時  
試問蘇公堤上月  
風流今古幾人詩

有客約會齊雲巖

知君脫屣上丹臺  
扶策東風我亦來  
隨步煙雲渾莫逆

近人猿鶴更無猜  
半空怪石如濤立  
幾處飛花作雪堆  
幽抱自憐無與共  
追尋何惜躡崔嵬

正德元年仲春望日

春轉南郊布穀啼  
太平天子試新犁  
龍耕芳野明金蹕  
犢輓晴莎快玉蹄  
百世菑畬方告事  
九重山袞亦沾泥  
杯稱萬壽東風裏  
鳳輦扶歸日未西

送陳大尹世用之任莆田

五雲天上擁星郎  
墨綬朱輪出帝鄉  
百里羨知民秀地

一簾閒坐國清堂  
莆中錦色爭春麗  
花外琴聲帶雨涼  
還擬清風明月夜  
翩然飛鳥到朝廊

觀荷花偶成

仙子娉婷向藕塘  
娟娟臨水弄新粧  
三千粉黛應無色  
十二欄干徧有香  
淨質紅塵元不染  
翠盤清露每相將  
碧筩我欲分芳味  
醉廁冰壺枕簟涼

春日登永寧寺山亭

林杪煙芳亦巧尋  
一亭元據最高岑  
繁紅下界人爭踏

幽翠上方塵不侵  
雨後苔痕封徑淺  
行邊鳥語出松深  
南郊登賞無逾此  
更對山花次第吟

題手澤遺思卷

寂歷寒花尚滿籬  
仙遊何處負歸期  
秋林不起尋詩杖  
夜雨空添洗墨池  
半篋香芸餘簡牘  
百年流水冷桐絲  
有人為襲生前物  
寂寞空山鶴自悲

除夕寓維揚

短景已從今夕盡  
相逢莫厭酒杯長  
旆留萍水多豪客

宴集椒盤半故鄉  
石鼎篆浮青縷細  
銀釭花逗紫萸光  
催行何處寒鐘早  
人迹橋邊未破霜

人日過寶應寄時獻

新年又度七朝昏  
消得淮南酒一樽  
江月載來帆有力  
湖雲飛去鏡無痕  
對鷗燈影漁歸浦  
隔樹風聲犬吠村  
客次偶逢鴻雁便  
題詩遙寄越王孫

濟南道中

萬里迢迢吾自來  
不辭青鬢著黃埃  
野無啼鳥春猶早

村有鳴雞午正催  
柳色欲黃微  
逗蠟麥痕初綠淺  
如苔  
東風曲阜平沙路  
驢背敲推亦快哉

靜海寺小山

何處飛來小玉峰  
空驚平地出芙蓉  
巖松有韻鳥相和  
石洞不扃雲自封  
摹景揮毫多讓客  
遇山留券每輸儂  
增奇為指峰前後  
擬結孤亭備萬容

登清涼寺

貪竒偶到翠峰頭  
分得僧家半榻幽  
三月去年如隔昨



四人今日復同遊苔花石背傳衣在泉玉山腰作帶留  
斜照射林煙欲合笑談猶未了壺籌

讀黃山圖經

正茲追遞憶鄉關偶向圖經見故山僧洞夜寒燈未滅  
鹿原秋老鶴初還湯泉不火烹煙外風瑟無絃奏樹間  
二十四溪香水碧何當乘月弄潺湲

贈別

漁笠沙邊雪半消石城寒抱水遙遙偶因出餞臨松閣

又見分春到柳條詩卷却慚賒隔歲離杯直欲永今朝  
分攜更縱江干目鳥外孤帆越夕潮

重登靈谷寺

境僻纖埃自不侵方盟三載喜重尋靈泉幻出龐眉遠  
寶塔移來蛻骨深笑容林花如識面避人江鶴未知心  
泛觴且醉松根曲聊與山門續舊吟

長干紀遊限韻

昨夜西風掩雨寒曉乘新爽度長干迎人漸覺青山近

避俗誰開綠野寬  
鳥外天涵秋水碧  
馬頭風逗木犀丹  
盤桓竟日無塵境  
幽翠紛紛不盡看

夜酌彭源石橋

駕石初傳水上杯  
披襟消得好懷開  
深山本靜夜逾靜  
明月欲來風亦來  
燈火雲中疑海市  
笙歌塵外醉瑤臺  
人間畫史應難寫  
直付詩翁次第裁

邕州感懷

莫唱當年苦李吟  
偏留此味到予今  
五花洲外雙愁鬢

百粵天南萬里心何必對人論曲直自難與世共浮沈  
紛紛從此遙相謝歸去黃山不可尋

汪子倫邀飲南陵西郊

一樽休惜十分傾銅柱相逢萬里情愚處溪山多改姓  
醉時文字頗知名紫檀槽滑新鶯細金縷衣翻小燕輕  
風月老子消未得不妨呼子作殷兄

退齋為汪益新作

平生懶著祖生鞭老卧閒雲向石田山雨自添眠犢草

溪風不動釣魚船  
幽蘿小院延寒月  
疎柳晴洲送晚煙  
却笑畏途爭進者  
幾人曾讀退齋篇

遊作遊舫為鳬溪之遊

濟川無夢亦無心  
合與漁人共陸沈  
小作蘭舫緣客步  
并浮茶竈為耽吟  
磯痕朝沒湍聲小  
山雨夜添溪水深  
從此不須勞杖屨  
鷺沙隨處快幽尋

五月五日舟遊

舟行又喜得新潮  
昨夜前溪沒渡橋  
靖節身閒惟欲醉

湘纍魂醒不須招  
蟠龍石上雲長暗戰馬灘頭迹半銷  
何幸聖恩憐病骨  
放歸煙水樂漁樵

茅山東下雲間訪吳黃洲漫興

十尺葭帆一葉舟  
偶乘佳興問黃洲  
朝隨雨度錫山脚  
暮與雲棲吳水頭  
俗客生涯無處盡  
癡人公事幾時休  
三茅道士都參透  
橫笛雙吹過虎丘

雲間載酒觀九峰偶成

一樽萍苻共佳朋  
桑梓他鄉樂可勝  
蒞愛金酥分曉露

蘼便煙雨搗香水越頭老客慚初到湖面好峯俱未登  
十里棹歸歌吹晚重煩洗盞更燒燈

舟過嘉興吳邦石邀飲寓館出婢菊花侑觴

典得鴛鴦湖上花就將湖水沁鉛華如何芳譽從陶宅  
却把穠粧比魏家紅掩櫻桃歌扇小翠拖楊柳舞羣斜  
醉覓渺渺知何處應逐行雲過客槎

登上方寺因過姜氏花園

竹西應是最高峯平見金山出水中地下有泉通蜀鉢

人間無夢到隋宮一時詩眼新如洗十載塵心舊已空  
野宴偏憐堪畫處白頭扶醉踏花叢

遊白塔河視通江牐碑有感

帆檣瓜步望中多白塔誰連古運河通塞世途紛類此  
廢興天數近如何頽垣敗瓦蕪官驛落日孤雲起牧歌  
我與殘碑俱棄物寧須感慨更摩挲

送瘧鬼

卧病山中雪又殘廿年鉛鼎未成丹脾愆正想水符急



腰瘦誰憐金帶寬寒燠或云元有鬼興居却幸已無官  
青皮白朮聊相餞好去幽林嘯月寒

遊問政山二首

老脚行山不用攜登登漸覺白雲低隴頭仙塚眠春犢  
樹底人家唱午雞入畫遠山青半出鋪茵細草綠初齊  
歸途誰遣桃花笑醉倒山翁已似泥

每逢佳處便開尊終日身當草樹繁遊幕板催歌屢響  
行厨煙續酒長溫松根雲斷忽無路竹外山迴又一村

隨步換奇吟不逮紛紛淡月已成痕

喜俞子薦至

落盡鶯花綠正濃一樽林館喜君同  
瓦盆新麥炊香白金鼎靈鉛發秘紅  
詩負雲山長作券釣便煙渚懶收筒  
相逢不說當年事十載邯鄲夢已空

鳧溪舟遊

去年多病負遊舫此日身強興覺豪  
搥鼓乘春開水宴釘盤隨處采溪毛  
衰榮已付春婆夢醒醉都忘楚客騷

却笑棹歌傳皓齒一時翻入紫檀槽

又

水花爭恨識君遲兩載相期酒一卮到此風波不生處  
政余行樂自由時扁舟野服人如畫落日煙汀景是詩  
却悔當年歸未勇急流猶或笑吾癡

宿汪壽甫別業擬乘旦遊石橋巖

行盡白雲山更山那知鳥道費躋攀相期造竹初非徑  
作伴尋幽只是閒趣在醉翁杯酒外詩來夢佛翠微間

明當破霧先騎鶴直度龍巖竈石關

觀石橋巖

一見谿谷思已飄小山叢桂不須招泉邊林下有予分  
天上人間無此橋怪石橫空飛彩竈長松終日弄洪潮  
分明自是登仙路誰道蓬萊隔世遙

北泉下曲水池初成桃谷陳汝謙王宗道適至  
昨夜薰風來亦奇為予吹送北泉詩鈎簾正捲西巖雨  
洗盞初傳曲水池好鳥有情頻噪樹幽花無語欲辭枝

須知脩禊尋常事何必蘭亭上巳時

北泉亭與仁峰翁賡和

白龍挂壁一千尺灑落半空珠玉青  
小阮似知迴俗轍  
北山先為築幽亭梅邊有句輸君唱  
泉外無聲慙我聽  
冉冉光陰如過鳥不妨閒月一尋盟

陪雲坡訪友人不至

雪消溪水綠痕痕度却南村又北村  
莎徑殘煙穿午淡  
柳堤新霽轉春溫  
過牆花影斜侵座  
隔樹禽聲碎滿園

數問主人來也未手談殘局已黃昏

留劉醫士為予治咳及疥

老扁乘舟將欲發棹歌聲響石門灘  
誼高不取千錢易  
歲暮相留一日難  
霜骨夜驚鱗甲起  
枯腸時咳玉珠殘  
病軀舍子堪誰寄  
莫厭蔬盤煙雨寒

夜酌東山十二臺

珮環飄下月黃昏  
疑是羅浮夢裏魂  
隔樹不爭金縷響  
滿身花弄縞衣痕  
攜來天上閒雲淨  
飄落人間笑語溫

十二瑤臺都醉徧東山此夕可同論

郡守張謙菴公以異議調守杭州賦此寄之

崎嶇五馬踏晨光風雨蕭蕭出紫陽  
益覺浮名真夢鹿空悲世路漫亡羊  
西風鶴影隨雲遠落日灘聲帶雨長  
誰道杭州非隸郡淳安元是歙東鄉

飲黃志勝半山亭

偶來山半一開樽曲徑斜通老石根  
高起樓臺塵外世俯聞雞犬水邊村  
野花樹樹酣春色好鳥聲聲破霧痕

十里歸途馱款段不妨明月近黃昏

小藕湖遊

兩岬初聞響棹歌一時觀者滿湖坡  
空中簫鼓延仙客鏡裏樓臺見影娥  
白石雨晴雲有態綠楊風細水無波  
停杯試問船頭月赤壁之遊更若何

飲葉思馥別業

紅藥臨階向午翻北山初識石林孫  
便呼猿鶴隨筇影定許壺觴濕袖痕  
野水拖雲來竹塢麥風吹雨淨花村



洞簫一曲青霞外不覺松根坐已溫

郡守留公改淫祠為東山書院邑尹藻塘洪公

落成席上賦此

扁舟昨夜雨中回聞說興賢太守來要與衣冠崇俎豆  
直披荊棘起樓臺修文不愧梅鎬業製錦還須子產才  
老我秋山亦何幸登臨先把落成杯

又

此舉元來兩得宜梁公徒解毀淫祠半山一變修文地

雙澗俱成洗墨池窗下傳心雞或悟水邊得句月先知  
紀勲何用磨崖石口是人間不斷碑

次何別駕九日登青蘿巖

西風吾亦欲來遊可遣黃花笑白頭兩屐直躋蘿岫月  
一杯還酌乳泉秋山公未試五三斗坡老先輸千百籌  
明日何妨重訂約更將詩酒破林幽

徑造程克明池上二首

聞說習池風景好三年前擬一登臨偶因送客乘高興

徑造為君續短吟石鏡雙分秋水淨瑤林四合午煙深  
花邊涼吹時生座不道人間有暑侵

艤舟鷗畔踏晴莎直造溪頭有竹家坐愛池魚牽斷荇  
閒看野鳥啄殘花弔醒未試端陽酒洗渴先嘗穀雨茶  
園主不知瀛客在叨叨只管講南華

四月四日予生朝墨泉作麻姑仙圖為壽自題  
退居斗室陋于蝸借問如何度歲華皎皎杯分天上月  
霏霏句覓水邊霞無人相挈拾瑤草有客閒來弄墨花

怪底麻姑春滿甕一時攜到野翁家

城西野宴

箇中那有暑相侵消得青松幾樹陰雲擁玉山橫草細  
風傳金縷出花深囀鳥晝閒頻唱和水鷗天遠自浮沈  
一聲長嘯千峰夕碎月滿灘秋滿林

登太平興國寺

偶出林棲到市廛不禁雙耳聒蛙蟬直來古剎披雲外  
少卧寒灘碎月前天上已傳嘉靖詔人間會有太平年

野臣際此情何極願與毗那祝舜禪

二

三宿山門百慮忘閒身真落竺西鄉坐當十寺煙霞勝  
行納五溪風雨涼自撥筠爐烹茗淨手持松帚掃苔荒  
蕭然雲水談禪處不道蘇公是借床

過妙法寺

讀書三十年前路此日那堪載酒來佛骨欲超終藉火  
詩龕可惜亦成灰一時舊雨人何在滿地春風花自開

劫劫看來真是幻不如隨處把芳杯

宿閔時遇別駕草堂

移來盆翠似雲屯  
曳杖何須更涉園  
四坐涼陰分樹色  
一簾疎雨濕花痕  
深宵疑卧山林寂  
清晝喜聞禽鳥喧  
此地正堪吾子隱  
闌非城市冷非村

登斗山平

曲徑崎嶇降復升  
幽尋忘却步伶仃  
隔林霜葉如飛雨  
負郭斗山疑落星  
洗眼儘多雲外畫  
醒心猶欠竹間亭

園丁却解歸來意，為我閒談種樹經。

仲秋遊鳧潭

秉燭何妨作夜遊，百年光景類蜉蝣。  
坐分幽樂當清世，影照寒潭半白頭。  
杯進紫霞空漢露，絃飛金縷壓梁州。  
歸來溪棹已成趣，不羨武陵湖上舟。

鳧溪小墅雜興

偶逢漁者話移時，坐愛平莎淨若篩。  
溪鳥水寒眠岸早，松雲翠濕度山遲。  
因詩稱聖人應服，以酒號仙吾不知。

獨上高樓問明月可禁遐思繞天涯

寄太守李本貞同年

笠簑已作釣漁人不受車輪馬足塵薄爾丘園惟守舊  
老子文字尚貪新向憐得郡八千里茲幸還家十二春  
三百同年魚雁杳江湖迢遞夢難真

閒適

世故于吾一不經尋常懶出醒翁亭敲詩林際忘長夏  
扶杖花前具老形邦國何曾裨氣力戶門猶沐減租丁



却慚疎野無由報但仰辰樞祝聖齡

宗丈一之池上檻成

欄干十二正相宜共向芳池酌一卮  
花底誰教紅袖倚鏡中微笑白頭窺  
歌聲繞屋塵初拂舞影凌波水不知  
留句他時傳故事風流未減習家池

春日登芝山弔水晶宮客汪廷器

王孫何處去不回依舊山亭面竹開  
幽徑風翻花作雪野塘春入水如苔  
乾坤轉眼成今古猿鶴多情自往來

一曲楚辭歌調苦雨前空灑紫芝杯

韓溪為汪世亨作

韓溪溪水碧潺潺上有葳蕤草樹間雲影半林迷雪屋  
書聲午夜出楂山時分桂粟聊供俎續種梅花別作關  
祇有漁樵能認路更無人識老蟠顏

十六日張元渙置歌舫邀遊虎丘

莫道歸來不是仙佳山到處有閒緣悟經未勘生公石  
啜茗先嘗陸子泉畫在穿雲笻影下詩成落澗雨聲邊

遊人不盡登臨眼猶費鵝溪買絹錢

小酌天平寺

老僧住此亦多年為指前庄是義田竹籬且停蕭寺雨  
芒鞋方濕古祠煙西巖不棟生成屋北斗量金無價泉  
日暮欲觀俱不及重來擬徧白雲巔

次方子澄韻

鏡山老去復何為黜陟人間總不知吟嘯峰頭應有分  
往來江上亦無期菱歌扇底風生面柘舞臺前月滿卮

遠水孤雲誰是主可將酩酊為君辭

望仙橋未登遂訪予鳬溪小墅

關徑初成跡未通茶煙深護小菴空何緣天上青雲客  
來顧林間白鶴翁司馬東蒙文更雅杜陵西蜀句偏工  
長才類假江山助遊興知君未易窮

登天池寺

登陟誰云蜀道難峽猿到此亦愁攀每逢絕壁驚迴棧  
何用層雲更作關暝色已封千壑雪磬聲遙隔幾重山

僕夫為指燈明滅應是毗盧候竹間

文殊臺

小菴分榻亦悠哉  
泉淥初傳第一杯  
誰把怪松留畫本  
自平生石作經臺  
巫雲挾雨將寒至  
海旭迎峰送霽來  
分付山靈看鐵櫂  
他時還駕上蓬萊

閔川幽居

欲問程子居白雲溪上  
是來往不逢人但見閒鷗起

規水漁歌

一澗小如規潺湲足清弄何處棹歌來忽驚沙鳥夢

隔峰嵐氣

嵐光近若無逾遠看逾好倏忽霽華開峰峰淨於掃

珠溪寺與汝信夜話

日沈花影收客散歌聲歇夜靜水邊樓相將弄明月  
一燈相對青幽話遺世故坐久不知更虛簷滴寒露  
人生縱百年世欲那遽了幽夢正悠悠僧鐘破山曉

聽雨

蕭蕭山寺雨十日足幽聞益見中年味淡于溪上雲

野興

來往不逢人  
所憤幽林下雨捲前溪晴  
漁竿正思把  
江柳風蕭蕭  
曉煙橫翠黛  
何處雙雁來  
叫破秋雲碎

題畫小景

何人結屋倚松根  
一片涼雲午作屯  
我欲相期來避暑  
薰風時聽翠濤翻

曉發遇雨

久霽殘秋暑尚侵出門涼雨忽駸駸山塵不動溪莎軟  
一路松聲送醉吟

曉度松岡

白雲無數鎖青山山下肩輿趁月殘忽上萬松崖上看  
青山更出白雲間

題畫小景

半山殘照明秋水一徑清風吹落花林杪雞聲煙外艇  
不成村落兩三家



寒飄雪色餘千嶂凍合溪流接兩涯何處行人迷去路  
山亭恰好見梅花

梅花鏡面

一夜朔風三尺雪紛紛無復競紅塵獨有孤山仙子在  
玉顏那改鏡中新

石溪斜出水條小誰著疎疎雪裏花明月無心淡相照  
却移清影過詩家

柳枝詞

不唱六朝楊柳詞繁華過眼已多時  
于今楊柳非前比  
無此繁華無此悲

輓釣隱翁

帶夕蟬鳴疎柳斜溪光鷗外淡晴莎  
夜深明月無人釣  
落盡西風白藕花

與客觀畫

話忘清窟夜迢迢灝氣通林暑氣消  
移燭畫屏秋更別  
西風吹雪到芭蕉

贈王德敷

一燈曾寓客窗寒  
青眼惟君作意看  
為別十年今始會  
渴懷傾倒坐更殘

留君夜餞水村寒  
折贈芙蓉共醉看  
正是不禁離思苦  
月明南浦雁聲殘

題方廷實畫海棠白頭翁圖

紛痕微受醉痕侵  
嬌倚東風似不禁  
却笑白頭枝上鳥  
惜花猶有少年心

巢父洗耳圖

一聞堯語如相浼  
急向溪頭洗耳頻  
莫道巢由至清者  
飲牛還有上流人

過北庄憶黃菊圃二守翁

晚林隨處可停車  
野徑尋詩向夕斜  
忽憶去秋人不見  
那禁清淚灑黃花

清溪曲曲樹依依  
幾處炊煙起翠微  
磯上不聞漁父唱  
石塘秋水淡斜暉

夜宿休寧丁氏春草亭

西風吹落月華殘  
芳草留春夜不寒  
一曲玲瓏聽不厭  
主人重進雪霏盤

石倉歷代詩選卷四百七十六

欽定四庫全書

石倉歷代詩選卷四百七十七

明 曹學佺 編

明詩次集一百十一

程銑

字瑞卿  
永康人

次停雲

飄飄涼風濛濛煙雨六合沉冥孔道云阻幽林適情高  
朋時撫靜言興思寤寐延佇

涼風飄飄煙雨濛濛六合沉冥孔道如江良朋攜壺飲  
我南窓彼美君子去此奚從

野有嘉木鬱鬱敷榮美人萃止愜我初情初情允愜駕  
車宵征矢心偕往以慰平生

岐有鳴鳳集彼梧桐瑞醞九苞好音諧和諧和好音覽  
德居多吾道已矣悵其如何

次丁柴桑

有客言邁有客言止達游明庭隱卧蒿里永保厥終亦



既淑始

筮仕棘林駕言所由于觀于樂知我心憂心之憂矣德  
譽孔休位不媿德去此何遊

次歸鳥

瞻彼高鳥清晨出林近息臺端遠憩丘岑含哺厥子勞  
酬素心呼類悲鳴秋雲凝陰

瞻彼高鳥于鳴于飛翱翔九霄斥鷃依依榆枋而棲飲  
啄而歸我棄雲衢雲衢我遺

瞻彼高鳥晨林徘徊一飛刺天誰復幽棲天路求友高  
空或諧字清氣淑眷眷永懷

瞻彼高鳥栖栖霜條凡禽莫窺整羽肅標一飛戾天鳴  
聲交交爾亦胡為下上忘勞

次形贈影

乾坤運大化氣機無停時飛潛與動植一氣感通之人  
為萬物靈橐籥理在茲堪嗟運數促聚散殊無期大夢  
忽復覺獨往何所思空遺身外名言之每淒而苦無速

化術自任了不疑願君勿相外濁酒醉不辭

次九日間居

東籬有佳菊采采樂吾生無酒斟以酌對此空負名逢  
時忽九日天宇清且明花枝濯露色鴈鴻厲秋聲悠悠  
持物變何以禦衰齡惻惻當世士有杯不得傾妄志謀  
聲利甘心慕軒榮縱懷難強制塵網易愆情安得從角  
里鼎鼎丹砂成

次歸田園居

生平慕閒靜雅志在丘山  
辭榮歸舊業忽忽十五年  
落鴻依故渚潛鱗戀深淵  
循徑尋東谷植杖耘南田  
幽篁六七叢茅屋三兩間  
寒梅發牆角細柳舞堤前  
蒼松停暮靄芳草漾晨煙  
月浸書幌內風來桂樹巔  
笳鼓清宵迥長歌白晝閒  
床頭新酒熟一醉任陶然

其二

解組卧幽谷山居鮮輪鞅  
朋來有餘樂心定無俗想  
松下黃綺逢軒前白鶴往  
晝靜人事絕夜寂道心長  
道心

日已長靈臺日已廣天衢任往來那復迷榛莽

其三

投簪入深山林泉誰與娛日日攜童冠緩步尋郊墟去  
去山北路望望村南居種菊尚三徑栽柳亦五株葛巾  
任蕭散軒冕胡能如欲尋鷗夷子散髮滄洲餘古有速  
化術此語竟為虛千年既成幻一笑終歸無

次遊斜川憶舊

余年未及艾荷恩東歸休山中鮮朋侶日與鹿豕遊憶

昔去蜀時放舟在中流履險過三峽輕生等浮鷗行行  
餘六月恬恬歸故丘憂時心欲折謀道人寡儔結屋方  
巖下弟兄聊勸酬視昔更思後可復如今否我生難百  
齡曷懷千歲憂俯仰苟無愧身外復奚求

次乞食

我昔遊金陵飄飄何所之側身入西天險道詎能辭  
灑灑已峽水真如天上來進棹節金鼓有酒忘傾杯喜無  
垂堂愁時和淵明詩觀風六七載每慚襪線才聖明許

歸隱朋舊時相貽

次和劉柴桑

美人別甚久相望何躊躇君去登華要我在山樓居睽  
隔三十年誰復顧寒廬握手黃金臺僑寓鍾山墟思之  
情耿耿起步遶畱畬世道日涼薄漠漠忘勞勩弱女以  
相歸愆期有待無詎意成中道緘書亦漸疎人生貴適  
意營營何所須修短終歸盡富貴浮雲如

次王撫軍座送客

秋容正淒淡萬彙日腓腓栗烈氣南肅飄飄鴈北歸荒  
砌寒蛩亂高樹鳴蟬依滄浪暗有約汀洲願不違寂寂  
花枝冷脩脩木葉悲晨遊逢勝景夕照明餘輝荏苒天  
山遠依稀塞路遲征鞍欣未駕脫穎僅如遺

次和胡西曹偶閱書有感

流光復初夏脈脈起南颺入面添新爽穿花射客衣朝  
霞生靄靈夜雨散霏微依依溪畔柳灼灼園中葵豈不  
媚時節涼秋溘以衰感物中心熱幽懷且一揮時至勿



矜速運去勿嗟遲擾擾世情子百年為爾悲

次從都還阻風規林

薄遊西湖曲仍戀故鄉居近可展親墓時以舒友于夙  
抱四海憂留滯東一隅行行隔天涯蹇蹇畏修塗落魄  
卧雲野清夢遶江湖靜聽鳥聲亂閒看花影疎勲名昔  
未足光景此有餘竊比山中僧朝貴焉能如

次懷古田舍

仕本為行道君子豈無貧貧者志力農終歲勞且勤躬

耕聖之事而況於農人畎畝嘗憂國食舊還思新東作  
望西成四農自欣欣俯仰既無累行止詎迷津出入常  
相友水火慰比鄰含哺擊壤歌允矣無懷民

次西田穫早稻

民以食為天有穫昌時端人秉耒耜業而以求飽安東  
作苟不勤秋成何由觀日出兮乃作日入兮乃還暮秋  
冬之漸霜氣早凝寒農父良獨苦終歲恒思難一身不  
任勞一家總繫干所以浮情子俯仰無歡顏君民曷並

耕憂樂本相關籍田崇三推朝野咸嘉嘆

次下澠田舍獲

閒居深樹林省欽北山隈俯仰各有託但願副所懷秋  
來望西成四農庶和諧家家易田疇晨興聽鳴雞隴畝  
傍溪源灌溉何縈迴年登聞餓殍困踣啼且哀人事常  
如此天日何由開所以沮溺輩四體弗敢頽亦有鹿門  
翁守耕志不乖爾農聽吾言婦子常安栖

次飲酒

達士恒任命跼跼將何之淵明飲酒吟不為飲酒時悠  
然而自得性真寫于茲吾見苟不早徘徊空自疑決策  
事柴桑憂樂勿相持

又

五十田園居適我遺世情但求心無愧豈欲隆虛名覆  
車戒往轍直道任平生清光白駒過浮生飛鳥驚天道  
有消息寵榮忌功成

又

紫燕銜青泥繞林雙飛飛一朝入華堂喃喃鳴聲悲徘徊如不安栖栖轉無依去去山人屋茅簷和日歸低回營窠巢哺雛雛不衰秋至別主人明年願勿違

又

垂垂籬畔菊九日何英英翫之不忍採徘徊自多情坐對撫一觴心怡還自傾醉臥東窗下林間一鳥鳴陶公邈千載胡不同其生

又

獨松秀萬木鬱鬱含芳姿因感君子操衆卉空標枝寒  
蔭垂遠陌過者咸稱奇呼童拾松子食之欲何為將攜  
赤松翁脫此樊籠羈

又

君子依於仁如何曠安宅鼎鼎宇宙內種種皆陳跡鳳  
鳴不復鳴人年不滿百園葵初扇紅吾鬢忽垂白寄言  
塵中人流光誠可惜

又

幼學踰弱冠聖道茫無得漸至知命年猶恐慚不惑方  
仕若好勝歷世情已塞任重徒有懷躬耕在鄉國心事  
屬兒曹端居正默默

次述酒

重華御皇極休譽絕前聞至仁流天地寧以夷夏分南  
封春拱日北闕曉瞻雲玉勅頒新國星輶賁舊墳臨朝  
敷大道聽治及清晨金水魚龍化天閑豹象馴元首光  
天德羣臣奮致身乾坤呈健順夙夜則恭勤郊社新分

祀華戎戴一君瑤琴發遺響玉調奏南薰文德能來遠  
羣公素尚文邊塵收漠北捷報出臨汾明良歡衍宴  
會樂紛紛率土稱元后皇天日鑒親一朝光典禮萬代  
慶明倫

擬古

鬱鬱岡上松盈盈堤畔柳折柳贈君行期與松同久天  
涯有孤客為我平生友思之愴不歡高歌對尊酒百年  
能幾時別離徒自負願言強加餐矢志酬高厚令德亮



可傳榮名竟何有

秋菊滿荒臺九日花堪採不採出門去歸來容色改行  
樂當及時桑田變滄海衰鬢忽垂白韶華豈相待營營  
竟無成日迫空嗟悔

雜詩

金烏出暘谷白兔升東嶺兩輪互往來流光奔電景時  
和天地交氣肅星河冷寒暑倏代謝晝夜短復永嗜酒  
勿盡醉顧形空負影人生不行樂隙駒徒馳騁不觀聲

利徒擾擾胡能靜

又

歲月不我與人事巧相迫幽篁發新林綠苗盈舊陌兩  
頰不長紅雙鬢忽垂白行行六袞餘去去路恐窄天地  
本逆旅吾身真過客但落形器中終當返故宅

又

浩然歸舊隱生計在農桑如何忽云逝虛堂委糟糠靜  
坐慘不歡怒饑非乏糧隆寒身不溫盛暑困驕陽撫衣

餘舊縷對几一何傷依依情靡及盼盼天一方徘徊終  
未釋聊以慰清觴

又

辭榮理舊業洵美非一端松菊時撫之星霜十五遷舒  
眺東山岑獨酌西嶺巔采采紫芝英逍遙適所餐悲感  
尋歸路慷慨結前緣諒哉有真樂為和歸來篇

又

鬱鬱古木茂淒淒曉風涼白雲滿巖壑落月明屋梁飛

鳥戀舊林遊子思故鄉回首憐朝露拂衣戒履霜抱此  
百年慮悠悠天共長

詠貧士

富貴蕩人志安得居蒿蓬俯仰觀鳶魚潑潑見化工舉  
世樂行義動慕漢魯龔巢由與夷夔隱顯趨不同君子  
素位行何心計塞通所遭有險易此道長相從

次詠三良

三良百夫特貞亮古之遺同氣咸一德此道何其微行

事雖莫稽秦穆愛匪私出入相股肱晨夕侍軒帷諫行  
而言聽心孚誼不虧百年生有限之死矢同歸厚恩終  
難報治命焉可違君沒臣俱逝事異古所稀臨穴自慄  
慨惴慄詩人悲至今歌黃鳥琅琅淚沾衣

次讀山海經

山高草木茂海深羅網疎魚鳥生其間游息如故廬閒  
居頗無累愛讀山海書動適耕耘會靜憩柴桑車甕頭  
酒初熟獨酌無肴蔬日月互推遷消息吾與俱一覽盡

物理良契靜者圖人生不為樂俯仰欲何如

次挽歌詞三首

生死固常理何修亦何促人稟命于天在數已定錄氣  
散魄飄飄空形入窾木朋舊撫棺哀兒女仰天哭善惡  
無由見晦明不自覺僅遺子若孫詎知榮與辱丈夫生  
世間何苦不知足

生前苦無酒死後空滿觴白雲墳上遠啼鳥坎外翔牲  
肴陳荒丘朋舊哭草傍有口舌不轉有目視無光昔在

華堂居今棄草露鄉永作泉下客一杯土中央

草色白皓皓木葉落蕭蕭枯形寄空木移置出荒郊清  
夜猿聲哀白日馬足嶢寃鳥啼古樹寒露滴霜條一入  
黃泉扃千秋不見朝千秋不見朝賢達其奈何濟濟送  
殯子逐逐自還家妻兒不能哀鄉井亦浩歌死去無生  
理體魄歸山阿

次聯句

鴈陣回衡峰衡峰高不極瞻彼寒棲鳥感之長太息大

鵬因風搏扶搖九萬力望望天南遊雲霄相整飭四顧  
沅湘外高舉嵩華側上下絕塵侶翱翔生羽翼皜皜秋  
空淨天水同一色寰區觀化理無然起皇惑

大王峰

我生赤松鄉遙想武夷跡掛冠不出門空負山水癖卧  
聽百鳥喧吟對一溪碧秋風忽乘興攜兒謫居客度嶺  
入崇安虛空聞鐵笛坐觀天柱峰半腰雲氣白

會仙巖



武夷山頭一片石白雲縹緲長如蓋武夷山下一曲水  
青松蹇蹇長相對水落石出天地寬仙子羣然日來會  
雲飛松老不見人牧笛一聲橫牛背

武夷五曲

紫陽精舍枕寒流仁智堂開任隱求止宿寮虛堪晚對  
寒栖館靜愜晨遊石門觀善道心長鐵笛橫風野興幽  
漁艇釣磯誰管領一溪茶竈篆煙浮

寒栖館

徒聞仙侶栖學之難為力畫靜山水深寒藤掛空壁

和文公九曲棹歌

海內名山此最靈奇峰六六九溪清武夷仙子今何在  
林外脩脩笛數聲

一曲溪頭齊放船天光雲影散平川仙人鶴化無踪跡  
碧澗蒼屏空暮煙

二曲嵯峨玉作峰雲鬟神女若為容等閒一枕遊仙夢  
知落陽臺第幾重

四曲凌霄昇日巖翠流空壁影毯毯一聲雞唱千林曉  
山色平分漾碧潭

八曲峰巒面面開啼猿飛鶴兩徘徊溪山絕處誰能領  
時有仙人駕鶴來

靈巖

古苔繡字綠斑斑彷彿羣仙翠羽團一隙通明天下曉  
滿山煙雨逼人寒

題詩巖

幾泛煙波倚棹歌沙頭閒却舊漁簑題詩醉卧三杯石  
雲滿空山雨滿莎

靈峰觀次黃致齋韻

黃名宗明鄞人兵部侍郎遷闕叅政

靈峰一望白雲多誰共幽人采芰荷九曲探源還我事  
飄飄巾舄映晴波

黃希英

字剛晦之子莆田人用  
有斗塘集

送同寅馬中孚督餉閩浙二省

國家有經費數貢在萬方厥土或壤埴成賦因低昂捍

禦藉北土饒餉資南荒道理雖遐邈貢賦固有常皇心  
每軫念狡猾遂鴟張庶官既瘵曠赤子添瘡瘡戶曹司  
國賄天語下巖廊藏奸命剗剔遏澤期汪洋馬君中州  
彥謹慙包中黃干將飛霜白驂騮噴玉行鴈塔早躋陟  
花封久歷駁醜髀劃已解肯綮豈張皇倏遷司徒秩欽  
承休命光旦暮既恐悚馳驅不自遑咨詢除宿蠹籌畫  
敷腎腸融盜敷陽和善忽回嚴霜赤城建霞幬天姥閣  
石隍鏡湖樵風便築道舊要章登臨緣峭絕眼界變軒

昂武夷排戟岫穹崇列帷綳縹緲神仙窟青瑩宋室璋

徽宗有玉簡長尺餘躋扳不可倦勝賞此尤良藹藹嵌崖樹巍巍

夫子牆

晦翁祠在四曲

捫蘿入雲島展敬薦溪芳縱宕追李白

浪遊過子長詩豪不可遏好景迫人忙倉廩既已竭蒸

黎實未康餓狼守庖廚饑虎牧牢羊勞心撫孱弱秉志

鋤奸強溪邊多檜樹去後作甘棠繭絲幸勿事慇懃勸

此觴

送同部陳啟周陞陝西少叅是日諸公同餞於

清涼寺分得暮字韻

三輔舊皇都肯綮古所數惟彼旬宣責藉君經濟具秉  
心既淵塞敷政無錯迕逸足籥雲飛奔崖懸水注昔日  
霜蹄淹今朝麟角遇錦帳已陪春彤庭還列鷺契誼投  
紵衣離愁繞江樹握手無限情江天雲欲暮

虛舟

千章大木出鄧林刻為巨艦倚江岑豪商黠賈侔大利  
翻成鹽井橫黃金益以萬鍾輕若羽如山屹立當江心

乘凌洪濤日千里簸驚蛟鱷潛幽深春來積雪消蜀門  
灔澦堆前細如馬驚雷怪波裂厚坤擊觸崩崖去如瓦  
黑風震撼洞庭波河伯之宮倏傾瀉乾坤蕩圻走荆吳  
螭駭鯨奔無處下此時橦檣不可恃激衝飄簸同浮查  
三老旁觀盡股慄天吳九首嬉相誇如何虛舟只一葉  
浮沉雲水倚江花野水纔深四五尺漁簑歸去夕陽斜  
縱被微風忽吹去觸突船艍人不忤人能虛心遊物外  
肝鬲腎腸盡傾露谷神不死妙無窮人世于今同一赴



漆園蒙叟最探玄達者妙應識其趣

題高房山畫山水行

房山西湖之子孫一腔汎掃與雲屯有時牙槎撐肺腑  
幻出雲濤漱灩澦鰲頭羣峰壓不住海上浮來雲外露  
長松落落鎖翠煙前村後村盡寒雨小橋駕壑無人行  
兩溪流水經石砢亂樹深中更繇邈五城縹緲飛朱甍  
此君北斗司喉舌妙手場中誇藝絕規模董李神更豪  
素練雲煙欲明滅中堂忽生太古色滉漾交迴渺難測

安得人間有此幽曠可冥搜  
吾將誅茅結屋終老長松側

題閔子祠

茲鄉生閔子萬載地猶輝  
地濶天應迥山明雨欲微  
斷橋流細水古柳倚柴扉  
野老心全古關門杜翠微

復和馬子莘三雨亭

蕪荒一肘地刈竹放雲來  
細草知春茁芳樽向晚開  
魚歡頻噉藻莓濕欲侵臺  
如寄吾生耳花前且舉盃

馬子莘太常無名亭對酌

對酌無名亭微風入夜涼  
雨醫新病草窗倚舊移簷逸  
興懸林壑丹衷答廟廊  
居人無老幼盡說有庚桑

到太平觀

鞅掌人間世仙都偶此遊  
竹林晴翠重茶竈紫煙浮  
倚樹衣尤冷看山雲欲流  
羽人多逸興攜我上山頭

炎蒸困驅逐勝地滌煩憂  
鳥與黃冠狎人因翠竹留  
松風六月冷鼎氣萬年浮  
即此是真境何須十二樓

鬪蟋蟀

促織寒聲切荒堦細草稠穴居牆有壘仰食露先秋勇  
鬪將誰為微軀敢自謀殘燈倚孤杼為爾憶闕樓

送汪別駕赴茂州

治最誇閩越新膺劇地勞程賒隨一鶴夢穩見三刀水  
入瞿塘險雲連棧道高訟庭閑白日花底酌醇醪

送同部陳啟周陞陝西少叅是日諸公同餞於

清涼寺

蓬萊左股走南州  
雉堞牽雲鎖翠虬  
峭壁千尋連虎踞  
嵌根終古壓江流  
苔封古井人猶恨  
僧掩禪關雲自浮  
它日鍾南欣賞處  
一川花柳憶同遊

又分得何字韻

深盃莫惜醉顏酡  
江樹冥冥暮靄多  
花發九重新雨露  
雲連百二舊山河  
一關涼月還驅馬  
八水殘民總負疴  
江草無情留錦纜  
分攜曾奈故人何

題傅太守幽居

年八十八

五峰溪畔有神仙甲戌英名列俊賢赤壁騎回坡老鶴  
青囊謝絕寵公錢閑行野色隨藜杖坐鼓春風入舜絃  
綠野堂開無限樂郭令孫子盡高騫

送張揮使出鎮鎮海

緹騎紛紛帕首紅將軍千里作旂幟令嚴刁斗三更月  
威凜貔貅一道風海賈行看歸島外鮫人知不到軍中  
如今頗牧煩當寧好樹雲臺第一功

遊觀道房

窗涵倒影水搖明  
薊子焚香坐誦經  
竹暖日邊調鶴舞  
風腥夜半聽龍鳴  
服殘石髓苔封鼎  
煉罷華池液轉瓊  
松影雲容疑可攬  
人間端亦有蓬瀛

與張南山振卿胡藻潭全之彭橫塘宜定飲部  
署觀冶金南山頌舊作有知字韻飲既南山  
拉藻潭橫塘騎馬歸希英當直巡宿署倚知  
字韻成一律錄呈

魚鑰沉沉禁漏遲  
孤燈細雨更淒其  
城頭月暗征鴻度

夜半霜寒老鶴知  
鼎裏裹蹠看潑灩  
枕中鴻寶覺支離  
有懷伯起不成寐  
冷坐幽齋自詠詩

南村

浦雲深處即南村  
野老閒來只閉門  
物外托交惟綠醕  
枕中誰夢到朱轡  
收將禾黍秋風晚  
散罷雞豚曉日曛  
積善莫疑天道遠  
還留老眼望兒孫

任鎮遠新鑿東山石洞同寅聯句寄靖州如舜弟



古洞雲埋太始苔山公初劖白雲開全憑神力為呵護  
要待高人與剪裁絕磴已將羣石補隙峰須把萬松栽  
新宮敬祀朱夫子吾道居夷也到來

西庄為上海戚上舍之父作

北簷獨看青不了西庄野老自忘機浦花亂隔青煙迥  
湖水平涵落照微忙為課童鋤藥隴閒來穿竹坐漁磯  
兔園讀罷無人到犬吠村雲掩畫扉

西愚詩為馬子莘姨夫作

茅屋斜連向蓐收老人兀兀坐溪頭漢陰園裏煙花靜  
給事庄前野水浮夢去獨遊神漢國詩成人在夕陽樓  
嗒然得喪渾忘我倚杖閒看人捶鉤

題睡鳥圖

春風媚桃李百鳥正嚶嘤爾獨高眠穩應知到白頭

種水仙花

宗生元不混塵緣雪貌幽姿總屬仙睡去蓬壺無覓處  
夢回香雪滿江天

丰神恍惚想凌波未許香塵污襪羅誰意玉京歸鶴馭  
滿園瓊佩舞婆娑

蓬萊山上罷瓊筵河伯宮中洗玉泉  
綰帶玉環裏香霧嬌姿誰羨鶴林仙

送僧

茅堂咫尺近蓬萊雲水平田盡日開  
大士居心原不礙故山無往亦無來

石倉歷代詩選卷四百七十七